



Sarajevo, 26. 07. 2019. godine

SAOPĆENJE ZA JAVNOST

Reagovanje na sadržaj demantija Medicinskog fakulteta izdatog povodom konferencije za štampu predsjedavajućeg Skupštine Kantona Sarajevo od 23. jula 2019. godine

Sa žaljenjem konstatujemo da se postupcima neodgovornih i očigledno zlonamjernih pojedinaca nastavlja zloupotreba institucije Medicinskog fakulteta Univerziteta u Sarajevu koja se ponovo ogleda u pripremi i objavljivanju krajnje neprimjerenog i uvredljivog sadržaja namijenjenog javnosti i medijima. Tzv. “demanti Medicinskog fakulteta”, objavljen 25. 07. 2019. godine, u više navrata, u negativnom kontekstu, korištenjem rječnika koji je neprihvatljiv u javnoj komunikaciji, a naročito u komunikaciji koja se veže uz akademsku zajednicu, spominje prof. dr. Rifata Škrijelja, rektora Univerziteta u Sarajevu. U tom smislu, a u cilju objektivnog informisanja javnosti, Univerzitet u Sarajevu javno reaguje na pomenuti “demanti” i skreće pažnju našoj javnosti na izrečene neistine i uvrede usmjerene na prof. dr. Rifata Škrijelja, rektora Univerziteta u Sarajevu.

Javni nastupi i obraćanja prof. dr. Rifata Škrijelja povodom dešavanja na Medicinskom fakultetu uvijek su bili i biće utemeljeni na jasno utvrđenim činjenicama i argumentima sadržanim u zvaničnim aktima i dokumentima Senata i Upravnog odbora Univerziteta u Sarajevu, Vijeća Medicinskog fakulteta UNSA, Ministarstva obrazovanja, nauke i mladih Kantona Sarajevo, Kantonalne uprave za inspeksijske poslove, Ministarstva finansija Kantona Sarajevo, Općinskog i Kantonalnog suda u Sarajevu, Institucije ombudsmena BiH, itd. Sve navedeno je dio obimnog sadržaja, u više navrata dopunjavane, krivične prijave koju je rektor Univerziteta u Sarajevu podnio Tužilaštvu Kantona Sarajevo, a povodom osnovane sumnje u nezakonito i nesavjesno postupanje odgovornih lica na Medicinskom fakultetu UNSA. O svemu je pravovremeno obavješteno i nadležno Ministarstvo obrazovanja, nauke i mladih Kantona Sarajevo od kojeg se tražilo da poduzme sve Zakonom utvrđene mjere koje bi postupanje rukovodstva Medicinskog fakulteta vratilo u okvire zakonitog djelovanja i omogućilo sankcionisanje odgovornih. Rektor Univerziteta u Sarajevu pozdravlja svaku mogućnost i priliku da i putem suda potvrdi sve javno izrečene stavove o nezakonitom i nestatutarnom postupanju i ponašanju na Medicinskom fakultetu UNSA.

U smislu gore navedenog, rektor Univerziteta u Sarajevu pozdravlja nastojanja Vlade i Skupštine Kantona Sarajevo, kao osnivača Univerziteta u Sarajevu, da omoguće potpuno provođenje aktuelnih integracijskih procesa koji predstavljaju najsveobuhvatniju reformu Univerziteta u njegovoj postratnoj historiji. Dosljedno provođenje zakona i stvaranje uslova za efikasnu provedbu reforme Univerziteta u Sarajevu je jedini kontekst u kome se realizuje saradnja predsjedavajućeg Skupštine Kantona Sarajevo i ostalih kantonalnih zvaničnika i rektora Univerziteta u Sarajevu. Nedolični i uvredljivi pokušaji da se saradnja nosilaca javnih funkcija na ostvarivanju javnog interesa, što reforma Univerziteta bez sumnje jeste, svede na odnos političkog klijentelizma, nažalost, govori samo o uznemiravajućoj činjenici da je i

akademska zajednica izložena lošem utjecaju svojih pojedinih članova i članica, koji javno djelovanje, vjerovatno na temelju ličnog iskustva, razumijevaju isključivo kroz odnose političkog mentorstva i patronaže, što i jeste jedan od razloga zbog kojih se reforma Univerziteta i provodi. Ujedno, to je i razlog zbog kojeg se javljaju manje ili više organizovana odbijanja reformskih procesa, pri čemu se djelovanje na Medicinskom fakultetu može smatrati krajnje radikalnim budući da izlazi iz okvira zakonskog djelovanja, što uključuje i neprovođenje pravosnažnih sudskih odluka, te neuređeno finansijsko poslovanje.

Uz puno uvažavanje značaja i uloge Medicinskog fakulteta UNSA i njenog radnog kolektiva kojeg čine vrhunski akademski i naučni radnici, stručnjaci i profesionalci, teško je prihvatiti ponašanje neodgovornih i utjecajnih pojedinaca i pojedinki koji sebi daju za pravo da, pod krinkom odbrane interesa i dostojanstva kolektiva Medicinskog fakulteta, najblaže rečeno, ignorišu institut vladavine zakona tako što ne provode pravosnažne sudske odluke. Primjera radi, prethodno navedeno je evidentno u slučaju prof. dr. Ismeta Gavrankapetanovića, po čijem zahtjevu je Općinski sud u Sarajevu broj: 65 0 Rs 714173 18 Mo od 15. 01. 2019. godine, donio rješenje kojim je utvrđena sudska mjera osiguranja Medicinskom fakultetu Univerziteta u Sarajevu, koji je bio obavezan da prof. dr. Ismeta Gavrankapetanovića odmah vrati na posao i rasporedi na poslove koje je obavljao prije donošenja rješenja o prestanku ugovora o radu broj: 01-3-GD-116/18 od 05. 01. 2018. godine. Obzirom da Medicinski fakultet Univerziteta u Sarajevu nije postupio po rješenju o određivanju sudske mjere osiguranja, Zaključkom Općinskog suda u Sarajevu broj: 65 0 I 752758 19 I od 20. 02. 2019. godine, u sudskom izvršnom postupku određeno je provođenje naprijed citiranog rješenja. S tim u vezi Medicinski fakultet je vratio prof. dr. Ismeta Gavrankapetanovića na Medicinski fakultet, ali ne obavlja poslove koje je obavljao prije donošenja rješenja o prestanku ugovora o radu stoga Medicinski fakultet nije postupio u skladu sa odlukom Suda.

Na žalost, slučaj prof.dr. Gavrankapetanovića je samo vrh ledenog brijega nepravilnosti koje se vežu uz funkcionisanje Medicinskog fakulteta. Kako bi omogućili precizan uvid u prethodno navedeno u cijelosti prenosimo obrazloženje iz Odluke o suspenziji rukovodioca organizacione jedinice Medicinskog fakulteta Univerziteta u Sarajevu, broj: 0101-7073/18 od 13. 11. 2018. godine. U obrazloženju se navodi sljedeće:

Prof. dr. Semra Čavaljuga je Rješenjem, broj: 0101-7958/17 od 27. 11. 2017. godine imenovana za dekana Medicinskog fakulteta Univerziteta u Sarajevu. U obavljanju dužnosti dekana prof. dr. Semra Čavaljuga je često propuštala da odgovorno i savjesno izvršava svoje zadatke utvrđene Zakonom o visokom obrazovanju Kantona Sarajevo, Statutom Univerziteta u Sarajevu (u daljem tekstu: Statut) i Rješenjem o njenom imenovanju na dužnost dekana.

Posebno se to odnosi na obaveze propisane odredbama člana 136. stav (6) Zakona o visokom obrazovanju prema kojim odredbama je imenovana odgovorna za poštivanje zakona i izvršavanje odluka vijeća, tijela visokoškolske ustanove i nadležnih organa vlasti u skladu sa zakonom i statutom te za izvršavanje zahtjeva rukovodioca visokoškolske ustanove kojim se osigurava zakonitost rada i funkcionalnost procesa na nivou visokoškolske ustanove.

Također, i prema odredbama člana 96. Statuta dekan/direktor je odgovoran za poštivanje zakona i izvršavanje odluka vijeća, univerzitetskih tijela i nadležnih organa vlasti u skladu sa Zakonom o visokom obrazovanju i Statutom.

Međutim, da postupanje imenovane nije u skladu sa citiranim odredbama Zakona o visokom obrazovanju i Statutom, odnosno da je često u suprotnosti sa citiranim Zakonom utvrđeno je na osnovu sljedećih činjenica i dokaza, i to:

- Po stupanju na dužnost dekana imenovana je propustila da poduzme potrebne mjere i radnje kako bi osigurala okončanje započete procedure izbora akademskog osoblja na Medicinskom fakultetu Univerziteta u Sarajevu, budući da prijedlozi za izbor u akademska zvanja prema zaključku Senata Univerziteta u Sarajevu sa 10. redovne sjednice održane 19. 07. 2017. godine, nisu bili usklađeni sa članom 156. Statuta;
- Prijedlozi odluka o izborima kandidata koji su doneseni na sjednicama Vijeća Medicinskog fakulteta Univerziteta u Sarajevu u direktnoj su suprotnosti sa pozitivnim zakonskim propisima i Statutom;
- Na prijedlog imenovane Medicinski fakultet Univerziteta u Sarajevu je na sjednici Vijeća usvojio dokument pod nazivom „Uputstvo o pisanju izvještaja za izbor akademskog osoblja“ broj: 02-3-6990/17 od 12. 12. 2017. godine, što nije u nadležnosti Vijeća, ni dekana i isto je u suprotnosti sa odredbama Zakona o visokom obrazovanju i Statuta;
- Imenovana i Vijeće nisu provodili konkursnu proceduru za izbore akademskog osoblja u rokovima utvrđenim Zakonom, te su donosili odluke o poništavanju nastavne potrebe suprotno Zakonu (Odluka o poništenju nastavne potrebe broj: 01-4-7066/17 od 14. 12. 2017. godine, Odluka o poništenju nastavne potrebe broj: 01-4-4452/18 od 20. 06. 2018. godine);
- Imenovana je propustila da u skladu sa odredbama člana 113. Zakona o visokom obrazovanju preduzme mjere i sankcionira komisiju koja je u postupku izrade izvještaja o izboru akademskog osoblja po konkursu koji je objavljen 30. 01. 2018. godine, isti dostavila sa značajnim zakašnjenjem, tek 18. 05. 2018. godine, što je u direktnoj suprotnosti sa rokovima utvrđenim Zakonom o visokom obrazovanju;
- Imenovana je postupajući prema odredbama člana 113. i člana 124. stav (6) Zakona o visokom obrazovanju dostavila dokumentaciju za kandidata dr. sci. Enisu Hodžić u postupku izbora u akademsko zvanje za koju je prosvjetni inspektor za visoko obrazovanje Kantona Sarajevo utvrdio da dostavljeni naučni radovi nisu bili objavljeni do dana zatvaranja Konkursa (Zapisnik Kantonalne uprave za inspeksijske poslove o izvršenom inspeksijskom nadzoru broj: UP-1-14-12-38-07192/18-12/02-003 od 17. 04. 2018. godine);
- U periodu od 05. 12. 2017. godine do danas na Medicinskom fakultetu je izvršeno više inspeksijskih nadzora kojima je utvrđeno da je Medicinski fakultet provodio postupak suprotno odredbama Zakona, te su po osnovu kršenja zakona Medicinski fakultet i njegova odgovorna osoba više puta prekršajno kažnjeni za što su im utvrđene novčane kazne;
- Imenovana je odbila da provede Rješenje Upravnog odbora Univerziteta u Sarajevu broj: 02-200/18 od 07. 09. 2018. godine i vrati u radni odnos prof. dr. Ismeta Gavrankapetanovića, ignorišući u tom smislu Preporuku Institucije ombudsmena/ombudsmana za ljudska prava Bosne i Hercegovine broj: P-203/18 od 04. 09. 2018. godine, te Zaključak Upravnog odbora Univerziteta u Sarajevu broj: 02-240/18 od 25. 10. 2018. godine, Rješenje prosvjetnog inspektora za visoko obrazovanje Kantona Sarajevo broj: UP-1-14-12-38-20361/18-12/02-004

od 19. 10. 2018. godine, zahtjeve Rektora Univerziteta u Sarajevu broj: 0101-6678/18 od 31. 10. 2018. godine i broj: 0101-6939-1/18 od 08. 11. 2018. godine.

Konačno, imenovana je donijela posebnu Odluku, broj: 01-3-7452/18 od 19. 10. 2018. godine, kojom je obustavila od izvršenja Rješenje Upravnog odbora Univerziteta u Sarajevu broj: 02-200/18 od 07. 09. 2018. godine, te ishodovala kod Ministarstva za obrazovanje, nauku i mlade Kantona Sarajevo da donese akt (Rješenje) da se predmetna Odluka pravilno temelji na Zakonu o ustanovama BiH, što je potpuno irelevantno jer je **prethodno** Rektor Univerziteta u Sarajevu predmetnu Odluku stavio van snage odnosno poništio Odlukom broj: 0101-6939/18 od 08. 11. 2018. godine iz razloga što Zakon o visokom obrazovanju je *lex specialis* Zakon u odnosu na Zakon o ustanovama BiH, a poseban zakon derogira primjenu općeg zakona (*lex specialis derogat lex generali*).

Nadalje, poštujući pravilo da *lex specialis derogat lex generali*, dekan Medicinskog fakulteta Univerziteta u Sarajevu je u obavezi raditi u skladu sa pravima i obavezama iz Zakona o visokom obrazovanju, kao *lex specialis* za Univerzitet u Sarajevu i njegove organizacione jedinice.

Također, predmetnom Odlukom dekana Medicinskog fakulteta Univerziteta u Sarajevu broj: 01-3-7452/18 od 19. 10. 2018. godine, nije objektivizirana šteta već se na istu imenovana samo proizvoljno poziva, a činjenica je da je šteta upravo nastala zbog neprovođenja predmetne odluke Upravnog odbora Univerziteta u Sarajevu jer je ista pravomoćna i izvršna, pa će u skladu s tim zasigurno sud obavezati Medicinski fakultet Univerziteta u Sarajevu da prof. dr. Ismetu Gavrankapetanoviću uspostavi sva prava iz radnog odnosa što podrazumijeva retroaktivnu isplatu naknade plaća, doprinosa na plaću, sudskih troškova i kamata.

Činjenica je da je Medicinski fakultet Univerziteta u Sarajevu propustio da pred nadležnim sudom osporava odnosno traži preispitivanje zakonitosti Rješenja Upravnog odbora Univerziteta u Sarajevu broj: 02-200/18 od 07. 09. 2018. godine, a što je trebao učiniti ukoliko je smatrao da je isto nezakonito, neprovodivo ili nejasno u bilo kom smislu, pa je citirano Rješenje postalo pravomoćno i izvršno i samim tim zakonito čak i da to nije bilo, a jeste.

Da se radi o nezakonitom postupanju imenovane pokazuje i Rješenje Kantonalne uprave za inspeksijske poslove Kantona Sarajevo broj: UP-1-14-12-38-20361/18-12/02-004 od 19. 10. 2018. godine kojim je naređeno Univerzitetu u Sarajevu da poduzme radnje i aktivnosti u cilju osiguranja izvršenja odluka tijela visokoškolske ustanove u smislu primjene člana 131. Zakona o visokom obrazovanju u roku od sedam dana od dana prijema rješenja. Istovremeno, Univerzitet u Sarajevu je zadužen da u roku od tri dana od dana isteka roka za poduzimanje naprijed navedenih radnji dostavi Kantonalnom prosvjetnom inspektoratu za visoko obrazovanje dokaz o izvršenju naređene upravne mjere. U obrazloženju citiranog Rješenja Kantonalna uprava za inspeksijske poslove Kantona Sarajevo upozorila je Rektora Univerziteta u Sarajevu da je odgovoran za poštivanje zakona i izvršenja odluka nadležnih organa vlasti, Senata Univerziteta u Sarajevu i Upravnog odbora Univerziteta u Sarajevu i drugih tijela visokoškolske ustanove. U tom smislu, posebno je ukazano Rektor Univerziteta u Sarajevu da je ovlašten suspendirati rukovodioca organizacione jedinice i pokrenuti postupak

utvrđivanja njegove odgovornosti na način utvrđen Zakonom o visokom obrazovanju, ako ne provodi odluke nadležnih organa Univerziteta u Sarajevu.

Prema odredbama članom 131. stav (6) Zakona o visokom obrazovanju Rektor Univerziteta u Sarajevu je odgovoran za poštivanje zakona i izvršavanje odluka nadležnih organa vlasti i tijela visokoškolske ustanove u obavljanju registrirane djelatnosti i ovlašten je od rukovodioca organizacione jedinice zahtijevati postupanje kojim se osigurava zakonitost rada, te funkcionalnost procesa na nivou visokoškolske ustanove/organizacione jedinice. Dakle, zakonska je obaveza Rektora Univerziteta u Sarajevu da se stara o izvršenju svih odluka Upravnog odbora Univerziteta u Sarajevu, pa tako i Rješenja Upravnog odbora Univerziteta u Sarajevu broj: 02-200/18 od 07. 09. 2018. godine, a što je Rektor i činio prema do sada preduzetim radnjama i aktivnostima, sa kojima je imenovana upoznata.

Istovremeno, odredbama člana 136. stav (4) Zakona o visokom obrazovanju propisano je da rukovodilac organizacione jedinice (dekan) za svoj rad u domenu akademskih pitanja odgovara vijeću i rukovodiocu visokoškolske ustanove (rektoru). Također, odredbama člana 96. Statuta propisano je da je dekan/direktor za svoj rad odgovara vijeću, rektoru i Upravnom odboru Univerziteta.

Zbog opstrukcija Medicinskog fakulteta Univerziteta u Sarajevu Upravni odbor Univerziteta u Sarajevu je Zaključkom broj: 02-240/18 od 25. 10. 2018. godine utvrdio da je neophodno primijeniti zakonom utvrđene mjere protiv dekana Medicinskog fakulteta Univerziteta u Sarajevu propisane odredbama člana 131. stav (8) i člana 154. stav (10) Zakona o visokom obrazovanju, a koje mjere podrazumijevaju obavezu Rektora Univerziteta u Sarajevu da suspendira dekana Medicinskog fakulteta u Univerziteta u Sarajevu i o tome obavijesti Upravni odbor Univerziteta u Sarajevu za njeno razrješenje.

Odredbe člana 131. stav 8. Zakona o visokom obrazovanju, glase: *“Rukovodilac visokoškolske ustanove (rektor) je ovlašten suspendirati rukovodioca organizacione jedinice ukoliko ne izvršava zakonito i savjesno svoje obaveze utvrđene zakonom, statutom ili drugim općim aktima visokoškolske ustanove i o tome u roku od 24 sata od dana od dana donošenja obrazložene odluke obavijestiti:*

- a) upravni odbor i senat visokoškolske ustanove,*
- b) vijeće organizacione jedinice i*
- c) organ uprave koji vrši nadzor nad zakonitošću rada visokoškolske ustanove“*

Imajući u vidu izloženo, a posebno činjenicu da postupanje prof. dr. Semre Čavaljuge nije u skladu sa citiranim odredbama Zakona o visokom obrazovanju i Statutom, odnosno, da je često bilo u suprotnosti sa citiranim Zakonom i Statutom, da je odbila odnosno da nije izvršila Rješenje Upravnog odbora Univerziteta u Sarajevu o vraćanju u radni odnos prof. dr. Ismeta Gavrankapetanovića i s tim u vezi Preporuku Institucije ombudsmena/ombudsmana za ljudska prava Bosne i Hercegovine, da je svojim ponašanjem prouzrokovala materijalnu/finansijsku štetu kako po osnovu izazivanja brojnih sudskih sporova zbog nepravilnosti prilikom provođenja konkursa i otkaza radnih odnosa, tako i po osnovu plaćanja kazni za prekršaje zbog kršenja zakona koje je utvrdila prosvjetna inspekcija, a čime je sve skupa dovela u pitanje ugled Univerziteta u

Sarajevu i Medicinskog fakulteta Univerziteta u Sarajevu kao organizacione jedinice Univerziteta u Sarajevu, a na osnovu ovlaštenja iz člana 131. stav (8) Zakona o visokom obrazovanju Kantona Sarajevo i člana 59 stav (1) tačke c) i 60. stav (4) Statuta Univerziteta u Sarajevu, donesena je Odluka kao u dispozitivu ove odluke.

Nadalje, u odnosu na razmatrane prigovore obespravljenih zaposlenika Medicinskog fakulteta, Upravni odbor Univerziteta u Sarajevu je u cilju osiguranja zakonitog djelovanja donio odluku o prijevremenom razrješenju rukovodioca organizacione jedinice Univerziteta u Sarajevu, broj: 02-310/18 od 11. 12. 2018. godine, kojom se prof. dr. Semra Čavaljuga prijevremeno razrješava funkcije rukovodioca (dekana) Medicinskom fakulteta Univerziteta u Sarajevu.

Na osnovu odredbe člana 137. Zakona o visokom obrazovanju Vijeće Medicinskog fakulteta Univerziteta u Sarajevu je ("Sl. novine Kantona Sarajevo", broj: 33/17) je bilo obavezno provesti proceduru izbora novog dekana. Unatoč ranije donesenim aktima, Vijeće Medicinskog fakulteta Univerziteta u Sarajevu je na 5. redovnoj sjednici održanoj 16. 05. 2019. godine donijelo Odluku o izboru prof. dr. Semre Čavaljuge za dekana Medicinskog fakulteta u Sarajevu za mandatni period od 2019-2023. godine. Po okončanju konkursne procedure, Vijeće Medicinskog fakulteta je Univerzitetu u Sarajevu dostavilo Rješenje o imenovanju dekana organizacione jedinice na potpis rukovodiocu visokoškolske ustanove.

Slijedom ranije navedenog, prof. dr. Rifat Škrijelj rektor Univerziteta u Sarajevu je prije potpisivanja dostavljenog Rješenja o imenovanju rukovodioca organizacione jedinice, a u cilju zakonitog postupanja inicirao davanje autentičnog tumačenja Zakona o visokom obrazovanju ("Sl. Novine Kantona Sarajevo", broj: 33/17) odredbe člana 137. stavova od (1) do (4), a u vezi sa odredbom člana 131. stavovi od (6) do (8) akt zaveden pod brojem: 0101-4965/19 od 24. 05. 2019. godine, te dopuna Inicijative za davanje autentičnog tumačenja Zakona o visokom obrazovanju ("Sl. novine Kantona Sarajevo", broj: 33/17) odredbe člana 138. stav (7) akt zaveden pod brojem: 0101-5586/19 od 12. 06. 2019. godine.

Skupština Kantona Sarajevo je u okviru Autentičnog tumačenja odredbe člana 138. stav (7). Zakona o visokom obrazovanju ("Službene novine Kantona Sarajevo", broj 26/19) istakla sljedeće:

"Odredba iz člana 138. stav 7. Zakona o visokom obrazovanju o izboru novog rukovodioca organizacione jedinice shodno se primjenjuje i kada Upravni odbor Univerziteta u Sarajevu iz razloga propisanih odredbama člana 154. stav 10.a-f donosi odluku o prijevremenom razrješenju rukovodioca organizacione jedinice. Izbor novog rukovodioca organizacione jedinice znači da se bira nova osoba za rukovodioca organizacione jedinice i da se ne može ponovo birati ni izabrati osoba koja je prijevremeno razriješena dužnosti rukovodioca organizacione jedinice, ako je na snazi odluka o prijevremenom razrješenju te osobe."

Da se radi o ispravnom postupanju osnivača, tj. Skupštine Kantona Sarajevo, svjedoči i Zapisnik o inspekcijskom nadzoru budžetske inspekcije Ministarstva finansija Kantona Sarajevo broj: 08-01-06-14-5771/19 od 06. 06. 2019. godine, iz kojeg je između ostalog vidljivo da je prof. dr. Semra Čavaljuga, neovlašteno, postupajući u svojstvu dekana Medicinskog fakulteta tokom 2018. godine, a zatim i nakon Odluke o suspenziji, koju je donio rektor Univerziteta u Sarajevu, prekoračila ovlaštenja i zloupotrijebila položaj rukovodioca organizacione jedinice na način da je u 2018. godini, suprotno Zahtjevu za budžetskim sredstvima za 2018. godinu Medicinskog fakulteta u Sarajevu, a koji je sastavni dio Zbirnog finansijskog plana Univerziteta u Sarajevu za 2018. godinu i koji je usvojen od strane Upravnog

odbora Univerziteta u Sarajevu, za plaće, naknade troškova zaposlenih i doprinose, od ukupno planiranog iznosa od 8.386.458,00 KM utrošen iznos od 9.451.145,12 KM, što je za 1.064.687,12 KM ili 12,69% više od odobrenog plana, bez saglasnosti Upravnog odbora Univerziteta u Sarajevu i suprotno odredbi člana 95. tačka c) Statuta Univerziteta u Sarajevu, a kojom je utvrđeno da dekan raspolaže finansijskim sredstvima do 60.000,00 KM po pojedinačnom nalogu u okviru finansijskog plana; bitno je napomenuti da je prof. dr. Semra Čavaljuga pokušala izvršiti retroaktivnu izmjenu i dopunu Finansijskog plana Medicinskog fakulteta za 2018. godinu od 10. 12. 2018. godine, međutim Upravni odbor Univerziteta u Sarajevu nikada nije razmatrao navedenu izmjenu i dopunu Finansijskog plana za 2018. godinu. Također, utvrđeno je i da za 2017. i 2018. godinu, Medicinski fakultet u Sarajevu nije izvršio uplatu sredstava u iznosu od 10% ukupno ostvarenih vanbudžetskih prihoda, a što predstavlja obavezu utvrđenu članom 10. stav (1) Pravilnika o ostvarivanju i raspolaganju vanbudžetskim prihodima Univerziteta u Sarajevu („Službene novine Kantona Sarajevo“, broj: 7/16).

Sve navedeno upućuje na osnovanu sumnju na počinjenje i krivičnog djela utvrđenog odredbom člana 383. Krivičnog zakona FBiH, te s tim u vezi pribavljanja protivpravne imovinske koristi sebi i većem broju lica sa Medicinskog fakulteta Univerziteta u Sarajevu i Kliničkog centra Univerziteta u Sarajevu.

Još jednom podsjećamo da je visoko obrazovanje djelatnost od posebnog značaja i interesa za Kanton Sarajevo, kako je to i propisano članom 2. Zakona o visokom obrazovanju Kantona Sarajevo. Poštivanje zakona i utvrđenih procedura osnov je osiguranja zakonitosti rada ali i funkcionalnosti procesa na nivou Univerziteta. Drugačije rečeno, vladavina prava je ključna u procesu završetka integracije Univerziteta u Sarajevo.

Univerzitet u Sarajevu je proteklu 2018. godinu uspješno završio u pogledu finansija. Na Skupštini Kantona Sarajevo je u junu usvojen i Izvještaj o radu sa finansijskim izvještajem te Izvještaj interne revizije o radu UNSA za 2018. godinu, tako da rukovodstvo Univerziteta u Sarajevu iza sebe ima dva pozitivna izvještaja za 2017. i 2018. godinu prihvaćena od osnivača, što je prvi put u novijoj historiji da UNSA, odnosno Upravni odbor UNSA, podnosi ove izvještaje osnivaču, a da te izvještaje na Skupštini KS referira i predstavlja rektor UNSA. Univerzitet u Sarajevu je u godini koja je iza nas podmladio svoj nastavni kadar za više od deset posto primajući mlade asistente i stručne saradnike. Dobio je logo za izvrsnost Evropske komisije. Potpisan je kolektivni ugovor i povećane su plaće akademskom osoblju za otprilike 70 do 80 posto, koje 15 godina nisu povećavane. Ovo su samo neki od uspjeha Univerziteta u Sarajevu u protekloj godini.

Ovom prilikom još jednom apeliramo na Vijeće Medicinskog fakulteta Univerziteta u Sarajevu da onemogući kršenje Zakona o visokom obrazovanju, kao i zloupotrebu zvanične veb-stranice Medicinskog fakulteta, koja se, očigledno, od neodgovornih pojedinaca koristi za istupe u javnosti koji sadrže neprimjerene kvalifikacije i elemente klevete usmjerene lično na rektora Univerziteta u Sarajevu, ali i druga tijela Univerziteta u Sarajevu. Istupe u javnosti koji se u ime Medicinskog fakulteta prezentiraju na veb-stranici Medicinskog fakulteta smatramo neprimjerenim pritiskom i javnim prijetnjama kojima se nastoji prikriti nezakonito postupanje rukovodstva Medicinskog fakulteta Univerziteta u Sarajevu. S obzirom da je zloupotreba zvanične veb-stranice Medicinskog fakulteta nastavljena, tijela Univerziteta su primorana da pokrenu aktivnosti na sankcioniranju odgovornih za ovakvo postupanje i zaštitu ugleda Univerziteta u Sarajevu.

Zloupotreba veb-stranice Medicinskog fakulteta, koja predstavlja oglasnu ploču organizacione jedinice, u vidu iznošenja kleveta protiv rukovodstva Univerziteta u Sarajevu, zvaničnika iz reda osnivača, te iznošenje političkih stavova nije prihvatljivo, što je definisano i Zakonom o visokom obrazovanju KS.

Služba za odnose s javnošću